



DECLARACIÓN UNIVERSAL DE LOS DERECHOS HUMANOS CHQUITANO

ARTICULO 1

Namanaiña baama osiborisapa aboma iku kix, uxiampae nakaxima, chepatai nikuaxima, aboma aibu ñapanaunkuxima, na uxia uimia imomantoe takanaxti chepe namanaiña yarukityoximantoe (H.H.).

Nanaiña axiba nosiborisapa abe iku kix, uxiampae nubakax, chepatai niyukuax, abe aibu ñupapanaunkux, na uxia oboi ñomeampatoe takanaxti chepe nanaiña nubarukixhatoe. (H.M.).

ARTICULO 2

I Namanaiña baama siborikoma aukiapae toxinaunku na uxia nuxia nisiborikixhimia, isamutema isiu naka nixhankaxti, sane nantí ikuna korobo bakipukux imo namanaiña, champiti takimanaunkunu, imoti pisixh, imoti naki purusubi, ñome paika, ma ñoñinka, nanaiña manityakaka, mapanaunkux, au makionkox imoti Tupax, o íxti ane kuañi kiatax au numakionko, aukina nokiatoe o axina aukiche usaka iku kix, imo baama chama nimonixhimia, imo baama chimoniopi isiu siro imoma axina korobo bakipukux (H.H.).

I Nanaiña axiba bosiboriko aukiapae toxinaunku na uxia nuxia niyosiborikixh, opisamute isiu naka niñuxiankax, sane nantí ikuna korobo bakipukux ñome nanaiña, champi na takimanaunkunu, imo na pisixh, imo na purusubi, ñome paika, noñinka, nanaiña manityakaka, mapanaunkux, au makionkox imo Nupu Tupax, o íxti ane kuañi kiatax au numakionko, aukina nokiatoe o axina aukiche usaka iku kix, ñone ba chama niñomonixh, ñome baityo chimomoniompí isiu siro ñome axina korobo bakipukux (H.M.).

II Champityo íxti takimanaunkunu na atoxi nomixhia imo baamantai xhanxima iriiburuma auna noki'i, íxti usakaityo au kiatax nasion ta'aityo makokonauna imo yakipukuxima.(HH).

II Champityo íxti takimanaunkunu na atoxi nomixhia ñomeantai axibatai muxianxi na atoxiu niriakax omemeku'u auna noki'i, íxti usakaityo au kiatax nasion ta'aityo makokonauna imo yupakipukux (HM).



ARTICULO 3

Namanaiña baama siborikoma iku kix, tari uxiantai nisiborikixhimia, na aisamunema isiu naka nixhankaxima, tapi ane uiche aiñamesoko nisiborikixhimia (H.H.).

Nanaiña axiba bosiboriko iku kix, tari uxiantai niyosiborikixh, na apisamune isiu naka niñuxiankax, tapi ane uiche aiñamesoko niyosiborikixh (H.M.).

ARTICULO 4

Chipueruxipi anati naki baserebio saneantai au nakaxtai imoti naki chama nimonixhti, aximanu baserebikix au nakaxtai imoti naki monio nuxia, ane yarusirixatoe bakipukux tapi anati ichibi moosoroti ni imotiipi taman naki kitipix nimonixhti'i (H.H.).

Chipueruxipi ane na baserebio saneantai au nakaxtai imo na chama nimonixh, aximanu baserebikix au nakaxtai imo na monio nuxia, ane yarusirixatoe bakipukux tapi ane na ichibiatai airo ikumanakatabo na kitipix nimonixh (H.M.).

ARTICULO 5

Champiiti puerux akiboriti saneantai ixti champi tyopikiche o au nakaxtai, champiitiyo puerux ataboriti uiti kiatax, ni anatiipi puerux airo saneantai kitipiti nominanti, chupueruxipityo achepekati takana numukianxi (H.H.).

Champi puerux akibori saneantai ixti champi tyopikiche o au nakaxtai, champiityo puerux atabori ui kiatax, ni anempi puerux airo saneantai kitipi nominanti, chupueruxipityo achepeka takana numukianxi (H.M.).

ARTICULO 6

Namanaiña baama osiborisapa toxinaunku imoma na uxia nisiborikixhimia au nanaiñantai kauta na siromati, tari tusiu imo namanaiña na nakaxti'i isiuki taman kichonimiakax korobo au nixixhti'i (H.H.).

Nanaiña axiba nosiborisapa toxinaunku ñome na uxia niyosiborikixh au nanaiñantai na kauta omenoti, tari tyusira ñome nanaiñantai na nakax isiuki taman kichonimiakax korobo au nixixh (H.M.).



ARTICULO 7

Chepatai isiu nusaka imo na korobo bakipukux, champiti naki manx kuasiri, nanaiña oñi tari chepe okimana utaku'u axina korobo bakipukux tari yacheraityo taikiana uxia nosiboriki, namanaiña tari makokonaumaintyo imo na bakipukux, axtina naki chimakokonaumpi o matompikaanati imo anatiiki aibu nixhankaxti aisamunenti nominanti imoti kiatax takana nakaxti'i (H.H.).

Chepatai isiu nusaka imo na korobo bakipukux, champi na manx kuasiri, nanaiña oñi tari chepe okimana utaku'u axina korobo bakipukux tari yacheraityo taikiana uxia nosiboriki, nanaiña tari makokonauintyo imo na bakipukux, axina chimakokonaumpi o matompikaana imo, aninki aibu nixhankax aisamune nominanti imo kiatax takana na nakax (H.M.).

ARTICULO 8

Namanaiña baama osiborisaapa pueruxima okimana tyakumantoe, esa baama okimanama nantax yutaku ba nomixia, tapi anati naki xhanxti aiñamesokoti na nuxia nosiboriki axina ane korobo iku na yarusirix bakipukux (H.H.).

Nanaiña axiba nosiborisaapa pueruxio amokima yutakuapatoe, yobesa ba omokimana nantax yutaku ba nomixia, tapi ane na xhanx aiñamesoko na nuxia nosiboriki axina ane korobo iku na yarusirix bakipukux (H.M.).

ARTICULO 9

Champiti naki osiborisapa puerux apreesoti saneantai champi tyakucho o ixti champi nipinatenti'i (H.H.).

Champi na nosiborisapa puerux apreeso saneantai champi tyakucho o ixti champi nipinate'e (H.M.).

ARTICULO 10

Namanaiña baama osiborisaapa tari aboma au nuxiatux, chepatai nikuaxima, tari namanaiña onkoimia nuraxti'i, axibamapae ma yiriabuka nantax siroma na okimama tyaku namanaiña ixti anati naki xhanxtai emeonoti oñi'i (H.H.).

Nanaiña axiba nosiborisaapa tari abe au nuxiatux, chepatai niyukuax, tari namanaiña omonkoi nurax, axibapae niriabuka nantax omeno na amokima yutaku nanaiña ixti ane na xhanxtai emeono oñi'i (H.M.).



ARTICULO 11

Namanaiña baama osiborisaapa ixti ane nipinateema isiatayto pueruxtityo okimati tyakutiatoe, ixti champiti naki axtaiti auki nixhtoxiatoe ixti ñemanauntu ane nipinatenti'i, ixti chiñemanauntupi, pueruxti nanti champi tusiubu imoti'i, tari yapacherati yirakatiiti isiu axina korobo bakipukux okimanabo utaku'u.

Champiti puerux airoti eana mapankax, na airo nominante kitipiti'i, tari yirakatiiti isiu na bakipukux na ane okimakax tyaku namanaiña iku na kix (H.H.).

Nanaiña axiba nosiborisapa ixti ane nopipinate'e isiatayto puerux okima tyakuatoe, ixti champi na axtai auki nixhtoxatoe ixti ñemanauntu ane nipinate'e, ixti chiñemanauntupi, puerux nanti champi tusiubu imo, tari yapachera o yirakati isiu axina korobo bakipukux okimanabo utaku'u.

Champi puerux airo eana mapankax, na airo nominante kitipi, tari yirakati isiu na bakipukux na ane okimakax tyaku namanaiña iku na kix (H.M.).

ARTICULO 12

Champiti naki puerux aiñanesokoti na uxia nosiboriki ixti manautaka au nopo, chipueruxpityo anati naki xhanx aiñamesokoti ui ñanityakaxti nominanti kitipiti kiatax.

Namanaiña baama osiborisaapa pueruxi okimama tyakumantoe isiuki na korobo bakipukux imo namanaiña, ñinana axiba chomixhiampi ikuna kix. **(H.H)**.

Champi na puerux aiñanesoko na uxia nosiboriki ixti manautaka au nopo, chipueruxpityo ane na xhanx aiñanesoko ui ñanityakax nominanti kitipi kiatax.

Nanaiña axiba nosiborisaapa pueruxi amokima yutakuatoe isiuki na korobo bakipukux ñome nanaiña, ñinana axiba chomixhiampi ikuna kix. **(H.M)**.

ARTICULO 13

Namanaiña baama osiborisaapa pueruxityo ameema kauta na nixhankaxima airomati, pueruxityo asamuna ipoboma au nanaiñantai na kauta uxia imoma na po'osoma tanu au nikiximantoe.

Namanaiñaintyo pueruxima airomati apaseama kauta na uxia imoma airomati ikuna kix, y na asikibimaintyo tato na aukiche tikañe aboma iku kix (H.H.).



Nanaiñaio axiba nosiborisapa pueruxio amame'e kauta na niñuxiankax amenoti, pueruxityo apasamu yopoobo au nanaiñantai na kauta uxia ñoome na bopo'oso tanu au niyokixatoe.

Nanaiñaintyo pueruxio amenoti apapasea kauta na uxia ñoome amenoti ikuna kix, y na apasikibiitato na aukiche tikañe abe iku kix (H.M.).

ARTICULO 14

ixti anati naki ikuneunu oñ'i, namanaiña baama osiborisapa pueruxima apachema kauta atanekama na uxia nakaxima au kiatax kix o axina kauta sirotiiti.(HH).

ixti ane na ikuneunu oñ'i, nanaiña axiba nosiborisapa pueruxio apapache kauta apataneka na uxia nubakax au kiatax kix o axina kauta siroti.(HM).

ARTICULO 15

Namanaiña baama osiborisapa pueruxima na aityusiankanamaki sukari namanaiña au kiatax kix. II. Champiti naki puerux aiñanekanati o aikiampianenti nakaxti'i iku kiatax kix (H.H.).

Nanaiña axiba nosiborisapa pueruxio na apityusiankanaño yusukari nanaiña iku kiatax kix.

Champiti na puerux aiñanekano o aikiampiane nakax iku kiatax kix (HM).

ARTICULO 16

Ma ñoñinka yochepe paika, ixti tiñatai nisiborikixhimia na apoma, pueruxima aisamunema isiu nixhankaxima, champiti puerux inanti imoti, tyopiki nakaxti o nisu nikitipixti'i, o tyopiki kiatax ñakionkoxti imoti boe Tupax, tari ñasamunatiya ipooboti peese aibu nikipoxtoti y baama aitoxti'i, tari pukinuñanati au nipoxti aibu o ixti siroti pinanakiti nikipoxtoti'i.

Tari poorama ui nixhaanuximantoe imomantoe, tapi anati kiatax asiote aikipuruma aibu nikusiux o mapixhumukux.

ixti axti osiborisapa titane peese nipoxti, tyone na bachebo ikusiupubu namanaiña, ityopiki tari tyoxira bayurakax ui ma yriabuka na tapi ane kausane imoti aibu baama isunaunkusuxti'i.(HH).

Paika yochepe noñinka, ixti tiñatai niyosiborikixh na aupo, pueruxio apisamune isiu niñuxiankax, champiti puerux inanti imo, tyopiki nakax o nisu nikitipix, o tyopiki kiatax ñakionkox imo nupu Tupax, tari ñasamuna ipoobo peese aibu nikiana yochepe naibosixh, tari pukinuñantai au nipox aibu o ixti siroti pinanaki nikiaana.



Tari yopoorá ui niñuxhiankax ñomeampatoe, tapi ane kiatax asio aikipurio aibu nikusiux o mapixhumukux.

Ixti axina nosiborisapa titane peese nipox, tyone bachebo ikusiupubu nanaiña, iityobo tari tyoxira bayurakax oboi ñiriabuka na tapi ane kausane imo yupu ba nisunaunkusux. (HM).

ARTICULO 17

Nanaiña oñi puerux oñenaxi y ane noesaatoe kix, manautaka o chepe ma kiataka.

Champi puerux aikiaibuti oñopinanki noñenaxiatoe o ixti noesatoe (H.H.).

Nanaiña oñi puerux oñenaxi y ane noesaatoe kix, manautaka o yochepe pikiataka.

Champi puerux aikiaibu oñopinanki noñenaxiatoe o ixti noesatoe (H.M.).

ARTICULO 18

Nanaiña oñi puerux uiña numapanaunku y uisamune isiu nuxianka, uiña numapensaka, na uikokoroti boe Tupax, o na uikoko nakaxti kiatax Tupax, manauntaka o chepe ma kiataka, tari tyusira oemoantai o imointyo namanaiña, isiuki manunekakax oemo o isiuki noñeanka (H.H.).

Nanaiña oñi puerux uiña numapanaunku y uisamune isiu nuxianka, uiña numapensaka, na uikoko naka nupu Tupax, o na uikokoityo naka kiatax nupu Tupax, manauntaka o yochepe pikiataka, tari tyusira oemoantai o ñomentyo nanaiña, isiuki manunekakax oemo o isiuki noñeanka (H.M.).

ARTICULO 19

Nanaiña oñi chepe baama osiborisapa puerux uisamune nubachikoi isiu naka nuxianka, axinampae numapensaka y numanityaka, tapi anati asioti ukuata tyaku nusuura y numapanaunku, na uityakimanaunku nityusikixh imo baama pasinitaaña tikañe'e, na atusi oemo ñapanaunkuxima y na usuraboi sukari makiataka, tapi ane uiche aityochenaka, tari yirakati ubauki axiba isiuche kutañax tanu iche nusuura (H.H.).

Nanaiña oñi yochepe axiba nosiborisapa puerux uisamune nubachikoi isiu naka nuxianka, axinampae numapensaka y numanityaka, tapi ane asio ukuata tyaku nusuura y numapanaunku, na uityakimanaunku nityusikixh ñome ba pasinitaaña tikañe'e, na atusi oemo ñupapanaunkux y na usuraboi yusukari pikiataka, tapi ane uiche aityochenaka tari yirakati ubauki axiba isiuche kutañax tanu iche nusuura (H.M.).



ARTICULO 20

Nanaiña oñi chepe baama osiborisapa puerux uyoberabara oñi chepe makiataka isiu naka nuxianka.

Champiti puerux apeneti imoti kiatax eana makiataka ixti chixhanxtipi (H.H.).

Nanaiña oñi yochepe axiba nosiborisapa puerux uyoberabara oñi, yochepeityo pikiataka isiu naka nuxianka.

Champi puerux apene imo kiatax omeana pikiataka ixti chimuxianxipi (H.M).

ARTICULO 21

Nanaiña baama osiborisapa puerux uiñanama imoti yiribux au nikiiti'i, takana nixhanka baama makiataka.

Nanaiña baama osiborisapa puerux aikoñokoti nisiborikixhti takana ma kiataka y na airoityo niriakax mekuti'i.

Axina yakipuku namanaiña baama siboriko iku noki'i tyone na ikukiche taruku nikusiu bakipukux imo namanaiña, ixti aibo uiñanati osiriatu, taikiana manauntaka uiñanati, tapi anati naki asioti nanti oemo kuri isiuti kiatax naki chuxianpi au numakionko(HH).

Nanaiña axiba nosiborisapa puerux uiñanio imo niriabux au nikix, takana niñuxianka axiba pikiataka.

Nanaiña axiba nosiborisapa puerux aikoñoko nisiborikixh takana axiba pikiataka y na airoityo niriakax meku'u.

Axina yupakipuku nanaiña axiba bosiboriko iku noki'i, tyone na ikukiche taruku nikusiu bakipukux ñome nanaiña, ixti aibo uiña nosiriatu, taikiana manauntaka uiña'a, tapi ane na asio nanti oemo kuri isiu kiatax na chuxianpi au numakionko (HM).

ARTICULO 22

Nanaiña oñi, usaka axipeku ma kiataka, puerux ayeti oemo nanaiña nomixia yayuraka noesa kobierno y axina bayurakax kuati auki tyiripo, na uxiaintyo nityoxikixh oemo nenaxi na kix, na ane nomoni, noñenaxi, na uxia nosiboriki chepe ma kiataka, aibu numapanaunku, aibu nukua oemoampatoe na akoñoko nosiboriki isiu naka nuxianka (HH).



Nanaiña oñi, usaka ubaxipeku pikiataka, puerux ayeti oemo nanaiña nomixia yayuraka noesa kobierno y axina bayurakax kuati auki tyiripo, na uxiaintyo nityoxikixh oemo nenaxi na kix, na ane nomoni, noñenaxi, na uxia nosiboriki yochepe ba pikiataka, aibu numapanaunku, aibu nukua oemoampatoe na akoñoko nosiboriki isiu naka nuxianka (HM).

ARTICULO 23

Namanaiña baama osiborisapa toxinaunku imoma na ane yachikoboiboma, na apachema na uxia imoma aisamuneema, na uxia au ñakionkoxima, chepe makiataka, y na anati okimana tyakuma tapi takirusu yachikoimia.

Tapi takimanaunkunumantai baama imoche atoxi uxia bapakakax ityobo yachikoimia.

Axti naki batrabakara, tari nanaiña yasuriurati bapakatax ityobo yaserebikixhti'i, tari ityobo ñakanasaxti uixh iñatai uiche asaparatiño baama aitoxti'i chepe nikipoxtoti'i, tari kimanamaintyo tyakuti ma kiataka.

Nanaiña oñi chepe ma kiataka pueruxityo uiyoberabara oñi chepe makiataka na oñokima ukuapatoe y tyaku na nuxiantimo (H.H).

Nanaiña axiba nosiborisapa toxinaunku ñome na ane yupachikoboibo, na apapache na uxia ñome apisamune'e, axina uxia au ñupakionkox, yochepe pikiataka, y na ane okimana yutaku'u tapi takirusu na yupachikoboibo.

Tapi mutakimanaunkunatai axiba ñomeche atoxi uxia bapakakax ityobo yupachiko'i.

Axina batrabakara, tari nanaiña yasuriura bapakatax ityobo yaserebikixh, tari ityobo

ñakanasax uixh iñatai uiche ansapario naibosityaiki chepe nikiana, tari omokimanaintyo yutaku pikiataka.

Nanaiña oñi yochepe pikiataka pueruxityo uiyoberabara oñi chepe oñokima utakuapatoe y tyakuityo na nuxiantimo (H.M).

ARTICULO 24

Nanaiña oñi takana baama osiborisapa ane makansakax oemo, na apukinumaintyo, na akupiumaintyo ixti champi yachikoboiboma, na merirau nuxia nitiempoxima y ixti makansarama nityakiru naskibese aibu yachikoimia tari nanaiñaintyo toxio imoti na nixhantimoti, ixti anankati batraabakarati na kauta ane nuxia monixh (HH).



Nanaiña oñi takana ba pikiataka nosiborisapa ane makansakax oemo, na aupukinuintyo, na apapiuintyo ixti champi yupachikoboibo, na merirau nuxia niñotiempos y ixti pakansara nityakiru naskiibese aibu yupachiko'i tari nanaiñaintyo toxio imo na nixhantimo, ixti ananka batraabakara na kauta ane nuxia monixh (HM).

ARTICULO 25

Namanaiña baama osiborisapa puerux aikoñokoma nisiborikixhimia au nipoxima na uxia nakaxima, namanaiña baama aitoxi'i, tapi ane taruku noxokox imoti'i, tari ane nanaiña utuburuboti'i, aibiboti y na uxia nipoxti, na anati yakurax bakuraati imoti ixti maunxokonoti'i, y nanaiña na nixhantimoti'i, ixti champityo trabakox imoti isiatai tari ane nanaiña imoti'i, ixti tipioximiati'i, ixti biuraxti'i o ixti ensoro pinanakiti nenaxixti auki naka tyanaunx o kiatax na chitusiupi imoti uiche.

Paix ixti aibo ane meku'u aibu nanaiñanti ikuxanax, pueruxtyo ane nuxia bakuirakax tyakuma. Namanaiña ma siomanka baama aboma iku kix au nipo ma yaitoxima tari anentyo nuxia bakuirakax tyakuma uiti yaitoxima chepe namanaiña (HH).

Nanaiña axiba nosiborisapa puerux apikoñoko niyosiborikixh au niyopox na uxia nubakax, nanaiñaio axiba naibosixh, tapi ane taruku noxokox imo, tari ane nanaiña utuburibo, aibibo y na uxia nipox, na ane yakurax bakura imo ixti maunxokono, y nanaiña na nixhantimo, ixti champityo trabakox imo isiatai tari ane nanaiña imo, ixti tipomaintyo, ixti miunatentyo o ixti ensoro pinanaki nenaxixh auki naka tyanaunx o kiatax na chitusiupi imo uiche.

Paix ixti aibo ane meku'u aibu nanaiña nikuxanax, pueruxtyo ane nuxia bakuirakax yutaku'u. Nanaiñaio ba siomanka axiba abe iku kix au niyopo niyubaix tari anentyo nuxia bakuirakax yutaku'u oboi ba aukiche abeeti yochepe nanaiña (HM).

ARTICULO 26

Nanaiña oñi chepe baama osiborisapa tari ane oemo manunekakax, aximanu manunekakax tari toxiatari, axina manunekakax na uxia nuxia numapanaunku tapi anati pinanso uixh, isiityo axina manx petaisiri nuxia nuñununekaka na ane nubachikoi isiuki au nosiboriki tari imo namanaiñaintyo, imo baama xhanximampae imo.



Axina manunekatax oemo baserebio imo na uxia nosiboriki y uxiantyo nusaka. Na aiñanaunuma oñi y oñokima tyaku nusaka, na uisamune au nosiboriki isiu naka nuxiantimo. Tari isiuki ma kiataka ta'a ubau pikiataka kika tari tyusira imoma kausane nosiboriki na taikiana uxiantai uimia oemo takana axoñi aibuma, axibamaityo po'osoma aukiapate tikañe iku nikiiximantoe y axibama anentyo nityupaximantoe. Tari isiuki uxiantie nuxia osoimatoe aibu namanaiña baama siboriko iku na kix ityooipiki tapi ane nominanti uyaxipeku'u.

Axibama yaixoxima y nipiakitoxima baama ma siomanka tari tyonema baama bapachero isane na uxia imoma na ununekama aibosixhimia (H.H.).

Nanaiña oñi yochepe nosiborisapa tari ane oemo manunekakax, aximanu manunekakax tari toxiatai, axina manunekakax na uxia nuxia numapanaunku tapi ane na pinanso uixh, isiityo axina manx petaisiri nuxia nuñununekaka na ane nubachikoi isiuki au nosiboriki tari imo nanaiñaintyo, ñome ba muxianxampae imo.

Axina manunekatax oemo baserebio imo na uxia nosiboriki y uxiantyo nusaka. Na apiñanaunu oñi y oñokima tyaku nusaka, na uisamune au nosiboriki isu naka nuxiantimo. Tari isiuki pikiataka ta'a ubau pikiataka kika tari tyusira ñome kausane nosiboriki na taikiana uxiantai oboi oemo takana axoñi yupu, axibaityo bopo'oso aukiapae tikañe iku niyokixxatoe y axiba anentyo niyutupaxatoe. Tari isiuki uxiantie nuxia osoimatoe aibu nanaiña axiba bosiboriko iku na kix ityooipiki tapi ane nominanti uyaxipeku'u.

Axiba niyubaix y niyupakix ba siomanka tari tyoneio ba bapachero isane na uxia ñome na amununeka nubaitosixh (H.M.).

ARTICULO 27

Namanaiña baama osiborisapa tari itusiankanatiya ñapanaunkuxti chepe nipiakaxti isukari namanaiña, tari ityusiankanatiya nipiakaxti aisamunenti na chitamampatai yachikoiti'i, y axina nikua nipiakaxti tari nanaiña toxio tato imoti'i.

Nanaiña axina uxiantie auki ñapanaunkuxtiatoe naki osiborisapa tari ane okimakax tyaku'u, tari namanaiña iñanaunumati tyopiki (H.H.)

Nanaiñaio ba nosiborisapa tari itusiankana ñapanaunkux chepe nipiakax isukari nanaiñantai, tari ityusiankanaintyo nipiakax aisamune na chitamampatai yachikoi, y axina nikua nipiaka tari nanaiña toxio tato imo.



Nanaiña axina uxiate auki ñapanaunkuxatoe na nosiborisapa tari ane okimakax tyaku'u, tari nanaiñantai opiñanaunta tyopiki (H.M.).

ARTICULO 28

Isiukina bakipukux imo namanaiña baama aboma ikuna kix, tari nanaiña kokono nuxiankax chepe niyikix ui ma yiriabuka y axibaama takana oñi tanu iche (H.H).

Isiukina bakipukux ñome nanaiña axiba abe ikuna kix, tari nanaiña kokono nuxiankax chepe niyikix oboi niriabuka y axiba takana oñi tanu iche (H.M).

ARTICULO 29

Namanaiña baama osiborisapa pueruxima po'oosoma axipeku ma kiataka, tyopiki auki nakaxima uxia nisiborikixhti'i.

Axina nuxianka nisiborikixhti osiborisapa, na atoxi nanaiña imoti, tari ñakokonauntiya imo na korobo bakipukux imo namanaiña, na makiataka aiñanaunumati, na pueruxi aisamunenti isiu nanaiña nixhankaxti'i chepe makiataka na kauta nisiborikixhti'i.

Axina toxio imoti, chipueruxipi anati naki inanti imoti'i sane nanti ikuna korobo ui namanaiña ma yiriabuka auki pikiataka nasioneka (H.H).

Nanaiña ba nosiborisapa pueruxio na bopo'ooso ubaxipeku pikiataka, tyopiki auki nubakax uxia nisiborikixh.

Axina nikoñokoko nisiborikix nosiborisapa, na atoxi nanaiña imo, tari ñakokonauna imo na korobo bakipukux ñome nanaiña, nauki pikiataka apiñanaunio, na puerux aisamune isiu nanaiña nixhankax yochepe pikiataka na kauta ane siboriko.

Axina toxio imo, chipueruxipi ane na inanti imo, sane nanti ikuna korobo oboi nanaiña niyiriabuka auki pikiataka nasioneka (H.M).

ARTICULO 30

Champi na ane korobo ikuna yarusirix bakipukux na chuxiampi imo baama yiriabuka auki taman nasion, imo baama takana oñi iku kix, na uxia yatrakakaxima y imoxti chitamampatai yachikoimia, chipueruxipi anati naki puerux aikiminakati axina tikorobo imo namanaiña baama siboriko iku na kix. (H.H).



Champi na ane korobo ikuna yarusirix bakipukux na chuxiampi ñome niriabuka auki taman nasion, ñome axiba takana oñi iku na kix, na uxia yupatrabakakax y imoxti chitamampatai yupachiko'i, chipueruxipi ane na puerux aikimainaka axina tikorobo ñome nanaiña axiba bosiboriko iku na kix. (H.M).

Traductores:

Pablino Parapaino Castro

Reyna García García,

Asunta García Choré.